

ছাপাখানার জন্ম

দেবাশিস্ ঘোষ



আমরা আমাদের দৈনন্দিন জীবনে যে-সব অজস্র জিনিসপত্র ব্যবহার করে থাকি, তার অনেক-গুলির জন্মের বা আবিষ্কারের এক একটা মজার মজার গল্প আছে। গল্প মানে মনগড়া আর আজগুবি কিছু কল্পকথা নয়। এইসব আবিষ্কারের গল্প মানে বৈজ্ঞানিক আবিষ্কারের সত্যকাহিনী।

মানব সভ্যতার ইতিহাসের পাতা ওলটালেই দেখা যাবে। যে মানুষ তার বুদ্ধি আর কল্পনার সাহায্যে কতশত বিচিত্র বস্তুই না নির্মাণ করেছে। তা না হলে সে প্রকৃতির প্রতিকূলতার সঙ্গে লড়াই করে করে আজকের এই অবস্থায় পৌঁছোতেই পারতো না। মানুষের চলার পথে যখনই কোনো অসুবিধা দেখা দিয়েছে কিংবা কোনো বাধা-বিপত্তি এসে তার রাস্তা আটকে দাঁড়িয়েছে, তখনই কিছু চিন্তাশীল মানুষ মাথা খাটিয়ে নতুন কিছু উদ্ভাবন করে সারা দুনিয়াকে চমকে দিয়েছেন। ইতিহাসের পাতায় এই আবিষ্কারকেরা চিরস্মরণীয় হয়ে আছেন।

এমনই এক আবিষ্কারের জন্য চীনদেশের ফুং তে আর পী চিং-এর নাম অমর হয়ে আছে। সে আজ থেকে হাজার বছর আগের কথা। প্রায় খ্রীষ্টীয় নবম শতাব্দীতে চীনদেশের এক খামখেয়ালী রাজার প্রধান মন্ত্রী ছিলেন এই ফুং তে। এই রাজামশায়ের এক একটি বিচিত্র খেলাল-খুশির ঘোষণা, প্রায় প্রতিদিনই নানারকম ইস্তাহার, নির্দেশনামায় লিখে লিখে প্রজাসাধারণের জ্ঞাতার্থে বিলি করা হতো।

একদিনের ঘটনা । একটি নির্দেশনামা কয়েকটি কাগজে লিখিয়ে রাজামশায়ের দস্তখৎ করাতে এনে মন্ত্রীমশায় বেশ বিপদে পড়লেন । খুঁতখুঁতে রাজা রেগেমেগে বলে বসলেন — “এমন বাজে হাতের লেখার নিচে আমি সই করবো না । যান ভাল করে লিখিয়ে আনুন ।” ফুং তে আর কি করেন । দেশের ভালো ভালো লিখিয়েদের ডেকে এনে তাদের হাতের লেখার পরীক্ষা শুরু করলেন । দেখা গেল যে একজনের

পড়ে কী বুঝলে ?

1. চীনের দুজন আবিষ্কারকের নাম লেখো ?
2. ফুং তে কে ছিলেন ?
3. রাজা কিসে সম্মতি দিলেন ?
4. পী চিং কে ছিলেন ?

হস্তাক্ষর সত্যিই বেশ ভালো । সেই দণ্ডেই তার লেখার নমুনা নিয়ে মন্ত্রী ছুটলেন রাজার কাছে । বললেন — “দেশে এর চেয়ে ভালো লিখিয়ে আর নেই । আপনি অনুমোদন করলে একেই নির্দেশনামা লেখার কাজে লাগিয়ে দিই ।” নমুনাটি নেড়েচেড়ে দেখে রাজা সম্মতি দিলেন ।

সেদিন কোনোরকমে তড়িঘড়ি করে সেই লিখিয়েকে দিয়ে কাজ শেষ করালেও মন্ত্রীমশায়ের দুশ্চিন্তা কিন্তু কিছুমাত্র কমলো না । মাত্র একজন মানুষ দৈনিক এত লেখা লিখবে কি করে ? তাও আবার একটি নির্দেশ একটি মাত্র কাগজে লিখলে চলবে না । একই লেখার কয়েকগুণা নকল চাই । অথচ একটিও খারাপ হলে রাজামশায়ের হাত থেকে রেহাই নেই ।

সারারাত ধরে ভেবেই চলেন ফুং তে । কিছুতেই কুলকিনারা পাচ্ছেন না । দু’চোখের পাতা তাঁর কিছুতেই এক হলো না । এদিকে ভোরের আকাশ ফর্সা হতে শুরু করেছে । হঠাৎ তাঁর মাথায় বিদ্যুৎ চমকের মতো একটি ভাবনা খেলে গেলো । উত্তেজনায় লাফ দিয়ে বিছানা ছেড়ে উঠে তিনি চাকরবাকরদের হাঁকডাক শুরু করলেন । একজনকে ধমক দিয়ে পাঠালেন রাজ্যের বুড়ো ছুতোর মন্ত্রী পী চিং-কে ডেকে আনতে । মন্ত্রী সবেমাত্র ঘুম থেকে উঠে প্রাতঃকৃত্য সেরে কাজের জন্য তৈরি হচ্ছিলেন । মন্ত্রীমশায়ের জোর-তলব পেয়ে পড়ি কি মরি ছুটলেন তৎক্ষণাৎ । পী চিং মুখোমুখি হতেই ফুং তে সেই লিখিয়ের লেখা একটি কাগজ সামনে পেতে জিজ্ঞাসা করলেন —

“পারবে, এই লেখাটিকে কাঠের উপর খোদাই করে দিতে ?” মিস্ত্রীর চটজলদি উত্তর - “এ আর এমন কী শক্ত কাজ ! নরম কাঠ পেলে ঘন্টা তিনেকের মধ্যেই করে দেব ।” মন্ত্রীমশায় আশ্বস্ত হয়ে বললেন - “তবে দেরি না করে এক্ষুনি লেগে যাও কাজে ।”

সত্যিসত্যিই নির্ধারিত সময়ের মধ্যে পী চিং তার বুড়ো হাড়ে ভেলকি দেখিয়ে কাঠ খোদাই করে ফেললেন । মন্ত্রীমশায় ফলকটি হাতে পেয়েই তাতে কালি মাখিয়ে একটি সাদা কাগজের উপর চেপে ধরলেন । কাগজে ছাপ উঠলো । কিন্তু এ কী ! লেখা যে সম্পূর্ণ উল্টো হয়ে ছেপেছে । ফুং তে আবার পড়লেন চিন্তায় । তবে সমাধান খুঁজে পেলেন খুব তাড়াতাড়ি । পী চিং-কে বললেন - “অন্য একটি কাঠের ফলকে এই উল্টো লেখাটাকেই তাড়াতাড়ি খোদাই করে দাও দেখি ।”

কয়েক ঘন্টার মধ্যে দ্বিতীয় ফলকটিতেও খোদাই সম্পূর্ণ হলো । এই উল্টো লেখা ফলকটিতে কালি মাখিয়ে কাগজে চেপে ধরতেই ফল পাওয়া গেল । হুবহু সেই ভাল লিখিয়ার হাতের লেখা । প্রধান মন্ত্রীমশায় আনন্দে আত্মহারা হয়ে হাততালি দিয়ে উঠলেন ।

পরের দিন থেকে সেই-লিখিয়ে, রাজার নির্দেশকে উল্টো করে লিখে দিত আর বুড়ো মিস্ত্রী কাঠের ফলকে চটপট তা খোদাই করে ফেলত । তারপর কালি মাখিয়ে পরপর কাগজে ছাপ নেওয়া হতো । অতি অল্প সময়ে কয়েকশো কাগজে একই ইস্তাহার বা নির্দেশনামা ছাপা হয়ে যেত ।

দিনের পর দিন যায় । ফুং তে-র আর ভাবনার শেষ নেই । ভাবলেন রোজ রোজ এত পরিশ্রম না করে যদি স্থায়ীভাবে এক একটি অক্ষরের হরফ তৈরি করে নেওয়া যায় তাহলে সবসময় লিখিয়ে আর মিস্ত্রীর দরকার হবে না, কাঠের খরচও কমবে । যেই ভাবা সেই কাজ । ফুং তে-র নির্দেশে পী চিং মাটির হরফ তৈরি করলেন । সেগুলিকে পুড়িয়ে শক্ত করা হলো । তারপর বড় বড় কাঠের ফলকে লেখা অনুযায়ী তা সাজিয়ে আঠা দিয়ে আটকে কালি মাখিয়ে কাগজে ছাপ নেওয়া

পড়ে কী বুঝলে ?

1. রাজামশায় কী ভাবে নিজের খেয়াল খুশির কথা ঘোষণা করাতেন ?
2. তাস ও ছবির বই কোথায় ছাপা শুরু হয় ?
3. কার চেষ্টায় পৃথিবীতে প্রথম ছাপার কল বা মুদ্রণ যন্ত্র আবিষ্কৃত হয় ?
4. কাঠের ফলকে কী মাখিয়ে কাগজে ছাপ নেওয়া হতো ?

হতে লাগলো ।

এইভাবে ফুং তে আর পী চিং - এর যোগাযোগের মধ্যে দিয়ে পৃথিবীতে প্রথম ছাপার পদ্ধতি আবিষ্কৃত হলো । পরবর্তী রাজা ও রাজপুরুষদের অবহেলায় কালক্রমে চীনদেশে এই ছাপার পদ্ধতি লুপ্ত হয়ে যায় ।

তার ছয়-সাত শত বছর পরে ইউরোপে তাস ও ছবির বই ছাপা শুরু হয় এবং খ্রীষ্টীয় পঞ্চদশ শতাব্দীতে জার্মানির গুটেনবার্গের চেষ্টায় পৃথিবীতে প্রথম ছাপার কল বা মুদ্রণ যন্ত্র আবিষ্কৃত হয় ।

জেনে রাখো

দৈনন্দিন	—	প্রতিদিন
উদ্ভাবন	—	নতুন কিছু তৈরী করা
আবিষ্কার	—	খোঁজ
চিরস্মরণীয়	—	চিরকাল মনে রাখার মতো
কল্পকথা	—	বানানো গল্প
ইস্তাহার	—	বিজ্ঞপ্তি
নির্মাণ	—	তৈরি
নির্দেশ	—	হুকুম
প্রতিকূলতা	—	বিরোধিতা
দস্তখৎ	—	সই
হস্তাক্ষর	—	হাতের লেখা
অনুমোদন	—	স্বীকার করা

দৈনিক	—	প্রতিদিন
নির্ধারিত	—	বাঁধাধরা
সম্পূর্ণ	—	পুরো
সমাধান	—	মীমাংসা
আত্মহারা	—	নিজেকে ভুলে
পদ্ধতি	—	উপায়
পঞ্চদশ	—	পনেরো

পাঠবোধ

খালি জায়গায় ঠিক উত্তর ভরো।

1. ইতিহাসের পাতার এই চিরস্মরণীয় হয়ে আছেন ।
(বৈজ্ঞানিক / আবিষ্কারকেরা)
2. খামখেয়ালী রাজার ছিলেন ফুংতে ।
(রাজমন্ত্রী / প্রধানমন্ত্রী)
3. এমন বাজে হাতের লেখার নিচে আমি করবো না ।
(সই / দাগ)
4. আপনি করলে একেই লেখার কাজে লাগিয়ে দিই ।
(আজ্ঞা / অনুমোদন; নির্দেশনামা / আদেশনামা)
5. দু চোখের তাঁর কিছুতেই হলো না ।
(মণি / পাতা; এক / দুই)

6. কাঠ পেলে ঘন্টা মথোই করে দেব ।
(নরম / শক্ত; তিনেকের / চারকের)

7. মাটির হরফগুলিকে শক্ত করা হলো ।
(শুকিয়ে / পুড়িয়ে)

সংক্ষেপে লেখো

8. মন্ত্রীমশায় একবার কেন বিপদে পড়ল ?
9. ছাপাখানার কাজ কী ? ছাপাখানা আমাদের কী উপকার করে ?
10. ফুং তে ও পী চিং কোথাকার লোক এবং তাঁরা কী জন্য বিখ্যাত ?
11. ফুং তে কোন দেশের প্রধান মন্ত্রী ছিলেন ? আর তাঁর রাজা কেমন ছিলেন ?
12. চীনদেশে ছাপার পদ্ধতি লুপ্ত হয়ে যায় কেন ?
13. মন্ত্রীমশায়ের দৃষ্টিস্তা কেন কমলো না ?

বিস্তারিতভাবে লেখো

14. ফুং তে-র একদিন রাত্রে ঘুম না হওয়ার কারণটি কী ছিল ?
15. ফুং তে পী চিংকে কেন ডেকে পাঠালেন ?
16. পী চিং কী ভাবে ফুং তের কাজটি করে দিলেন ?
17. মাটির হরফ তৈরির ঘটনা নিজের ভাষায় লেখো ।

ব্যাকরণ ও নিমিতি

1. অর্থ ঠিক রেখে প্রতিটি শব্দকে দুভাগে ভাগ করো —

কল্পকথা	— + — ,	পঞ্চদেশ	— + — ,
কুলকিনারা	— + — ,	প্রাতঃকৃত্য	— + — ,
চটজলদি	— + — ,	প্রজাসাধারণ	— + — ,

চাকরবাকর	— + —,	মুখোমুখি	— + —,
জিনিসপত্র	— + —,	রাজামশায়	— + —,
কোনোরকমে	— + —,	সত্যিসত্যিই	— + —,

2. বিপরীত শব্দ লেখো

আবিষ্কার	—	দুশ্চিন্তা	—
সত্য	—	শত্রু	—
অসুবিধা	—	আশ্বস্ত	—
সন্মতি	—	সম্পূর্ণ	—

জেনে নাও

আজকাল কী ভাবে প্রত্যক্ষ যোগাযোগ ছাড়াও শুধু কম্পিউটারের বোতাম টিপে একদেশে বসে অন্য দেশে ছাপার কাজ করা সম্ভব হচ্ছে, তা তোমরা শিক্ষক মহাশয়ের কাছ থেকে জেনে নাও।

